

Kulturikkut eriajisassat eqqissisimatitaanerat pillugu Inatsisartut inatsisaata nr. 18, 19. november 2007-imeersup allangortinneranik inatsisartut inatsisissaattut siunnersuut. (Sumiiffiit kulturikkut oqaluttuarisaanermut pingaarutillit allatigut kulturikkut kingornussatut illersorneqarnerat)

§ 1

Kulturikkut eriajisassat eqqissisimatitaanerat pillugu Inatsisartut inatsisaanni nr. 18, 19. november 2007-imeersumi allanguutigittinneqassapput makku:

1. Inatsisartut inatsisaata taaguutaa imaalissaaq:

"Kulturikkut eriajisassat eqqissisimatitaanerat aamma kulturikkut kingornussat allatigut illersugaanerat pillugu Inatsisartut inatsisaat".

2. § 1, *imm.* 3 imaalissaaq:

Imm. 3. Inatsisartut inatsisaata qularnaarppaa Kalaallit Nunaata kulturikkut kingornussai tassaasut nunarsuup inuillu oqaluttuarisaanerannut pingaaruteqartumik ilaasut, Kalaallit Nunaatalu nunarsuup kulturikkut kingornussai tamaaniittut suliniuteqarfiusumik kulturikkut kingornussanik illersuinermit eqqissisimatitsinertut kulturikkullu kingornussanik allatigut illersuinertut ilusilikkamik isumagigai.

3. § 7. *imm.* 1 aamma *imm.* 3-mi "Atuisut nunaminertamik atuinissamut akuerineqarsimasut" kingornatigut ilanngunneqassaaq: "imaluunniit nunaminertap atornissaanut allatut pisinnaatitaaffeqartut".

4. § 13 oqaasertalerneqassaaq imatut:

“§ 13. Nunatta Katersugaasiviata aalajangiiffigissavaa, illut oqaluttuarisaanikkut imaluunniit ilusilersueriaatsikkut naleqassusiat pissutigalugu piginnarnissaat pingaaruteqartut eqqissisimatitassanngortinneqassanersut.

Imm. 2. Illunik eqqissisimatitassanngortitsinermit ilaasinnaapput:

- 1) Illu tamarmi,
- 2) Illup silataa,
- 3) Illup immikkoortui ataasiakkaat.

Imm. 3. Eqqissisimatitassanngortitsinermit aamma ilaasinnaapput illup toqqaannartumik avatangiisai, taakku ataatsimut isiginnilluni piunnartittariaqarpata illersortariaqarpatalu.

Imm. 4. Illunik eqqissisimatitsinerup nassataraa illup aserfallatsaalinnissaanut naleqqiullugu immikkut pisussaaffeqarnek illullu sanaartornikkut suliarinnissaanut killilersorneqarnek, tak. § 14.

Imm. 5. Nunatta Katersugaasiviata inassuteqareerneratigut Naalakkersuisut illut eqqissisimatinneqarnissaat pillugu aalajangersagaliorsinnaapput, taakkununga ilaatillugit eqqissisimatitsinissamut piumasaqaatit."

5. § 13 kingorna ilanngunneqassaaq:

“§ 13a. Nunatta Katersugaasiviata sumiiffiit kulturikkut oqaluttuarisaanermut attuumassuteqartut eqqissimatinnissaat aalajangissavaat, taakkua piunnartinneqarnissaat illersorneqarnissaalluunniit - kulturikkut oqaluttuarisaanermi naleqassusiat pissutigalugu - annertuumik pingaaruteqarpat.

Imm. 2. Sumiiffiit kulturikkut oqaluttuarisaanermut attuumassuteqartut eqqissisimatinnergarnerannut ilaavoq, kulturikkut eriagisassat arlaqartut summiiffiulluunniit immikkut pisimasoqarfiusup imminnut ataqatigiinnerat.

Imm. 3. Sumiiffiit kulturikkut oqaluttuarisaanermut attuumassuteqartut eqqissisimatitaanerisa nassataraat, sumiiffimmi pineqartumi kikkulluunniit isersinnaatitaanerisa saniatigut sumilluunniit allamik ingerlatsisoqassanngimmat. Tamatuma sanioqqunneqarnissaa Nunatta Katersugaasiviata qinnuteqartoqareerneratigut akuersissutigisinnaavaa, immikkorluinnaq pequtisaqartoqartillugu.

Imm. 4. Nunatta Katersugaasiviata inassuteqareerneratigut Naalakkersuisut sumiiffiit kulturikkut oqaluttuarisaanermut attuumassuteqartut eqqissisimatitaanissaat pillugu aalajangersa-galiorsinnaapput, taakkununga ilanngullugit sumiiffiup killilerneqarnera, atorneqarsinnaanera, ingerlannissaa aamma akiliuteqarunnarluni iserfigineqarsinnaanera.

”§ 13b. Naalakkersuisut Nunatta Katersugaasiviata tamanna pillugu inassuteqaateqareerneratigut, sumiiffiit kulturikkut oqaluttuarisaanermut attuumassuteqartut, allatigut kulturikkut kingornussatut illersorneqassanersut aalajangissavaat, taakkua piunnartinneqarnissaat illersorneqarnissaalluunniit - kulturikkut oqaluttuarisaanermi naleqassusiat pissutigalugu - annertuumik pingaaruteqarpat.

Imm. 2. Sumiiffiit kulturikkut oqaluttuarisaanermut attuumassuteqartut allatigut kulturikkut kingornussatut illersorneqarnerannut ilaavoq, kulturikkut eriagisassat arlaqartut summiiffiulluunniit immikkut pisimasoqarfiusup imminnut ataqatigiinnerat.

Imm. 3. Sumiiffiit kulturikkut oqaluttuarisaanermut attuumassuteqartut allatigut kulturikkut kingornussatut illersugaanerisa nassataraat, ingerlatsisoqassanngimmat sumiiffiup ilaanik imaluunniit sumiiffimik tamarmik takujuminaallisitsisunik imaluunniit aseruisunik. Tamatuma sanioqqunneqarnissaa qinnuteqartoqareerneratigut Nunattalu Katersugaasiviata inassuteqareerneratigut Naalakkersuisut akuersissutigisinnaavaat, immikkut illuinnartunik pequtissaqartoqartillugu.

Imm. 4. Nunatta Katersugaasiviata inassuteqareerneratigut Naalakkersuisut sumiiffiit kulturikkut oqaluttuarisaanermut attuumassuteqartut allatigut kulturikkut kingornussatut illersornissaat pillugu aalajangersaasinnaapput, tamatumunga ilanngullugit sumiiffiup killilerneqarnera, atorneqarsinnaanera ingerlannissaa aamma akiliuteqarunnarluni iserfigineqarsinnaanera.”

6. § 14, oqaasertalerneqassaaq imatut:

“§ 14. Illumik eqqissisimatitaasumik piginnittunit, illu eqqissisimatitsinermut naapertuuttumik isumannaatsumik aserfallatsaalissavaat. Nalinginnaasumik aserfallatsaaliuineq pissaaq atortut, periutsit qalipaatiillu maannamut atorneqartut assingi atorlugit, illullu eqqissisimatitassanngortitaasimasup eqqissisimatitassanngortitsinerup nalaani qanoq issusianik isikkuanillu ataavartitsinissaaq naapertorlugi.

Imm. 2. Illu eqqissisimatitassanngortitani sanaartorerit tamarmik Nunatta Katersugaasivianit akuerineqaqqaartussaapput, suliaq illup ilaanut eqqissisimatitassanngortitsinermit pineqartumut ilaappat, suliarlu nalinginnaasumik aserfallatsaaliinermit annertuneruppat. Nunatta Katersugaasivia akuersissummut atasumik piunasaqaateqarsinnaavoq.

Imm. 3. Qinnuteqartoqareerneratigut Nunatta Katersugaasivia aalajangersinnaavoq illumi eqqissisimatitassanngortitami aserfallatsaaliuinnermut imaluunniit sanaartornermut aningaasartuutit, Inatsisartut aningaasanut inatsisisaanni aningaasaliissutit iluanni tamakkiisumik ilaannakortumilluunnit aningaasartuutigineqassasut.”

7. § 15, oqaasertalerneqassaaq imatut:

“§ 15. Illut eqqissisimatitassanngortinneqarsimasut aamma sumiiffiit kulturikkut oqaluttuarisaanermut attuumassuteqartut eqqissisimatitaasut imaluunniit allatigut kulturikkut kingornussatut illersorneqartut Nunatta Katersugaasiviata nalunaarsussavai.

Imm. 2. Illut eqqissisimatitassanngortinneqarsimasut aamma sumiiffiit kulturikkut oqaluttuarisaanermut attuumassuteqartut eqqissisimatitaasut imaluunniit, inatsit manna malillugu kulturikkut kingornussatut allatigut illersorneqartut Nunatta Katersugaasiviata nakkutigissavai.

Imm. 3. Sumiiffiit eqqissisimatitaasut kulturikkut kingornussatut allatigut illersorneqartut aserfallatsaaliorneqarnerat Nunatta Katersugaasiviata Inatsisartut aningaasanut inatsisisaanni aningaasaliissutit iluanni isumagissavai.”

8. § 16, *imm. 2*, oqaasertalerneqassaaq imatut:

“*Imm. 2.* Kulturikkut kingornussat pillugit siunnersuisoqatigiit eqqissisimatitassanngortitsinissamik aamma kulturikkut kingornussatut allatigut illersugassanngortitsinissamik suliaq, tak. § 17, pillugu inassuteqaasiussapput, aammalu § 14 naapertorlugu akuersissutinut atatillugu tusarniaavigineqassallutik. Taakku saniatigut Kulturikkut kingornussat pillugit siunnersuisoqatigiit illut eqqissisimatitassanngortinnissaannut aamma sumiiffiit kulturikkut oqaluttuarisaanermut pingaarutillit kulturikkut kingornussatut allatigut illersugassanngortinnissaannut tunngasuni taakkunungalugu attuumassuteqartuni siunnersuisutut inissisimassapput.”

9. § 17, oqaasertalerneqassaaq imatut:

“§ 17. Piginnittut, atuisut atuinissamut akuersissutaatillit allatulluunniit nunaminertamik atuisinnaatitaasut, naalagaaffik, kommunit, sumiiffinni ataasiakkaani katersugaasiviit aamma peqatigiiffiit taamaaliornissamut Nunatta Katersugaasivianit akuerineqarsimasut, eqqissisimatitassanngortitsinissamik aamma kulturikkut kingornussatut allatigut illersugassanngortitsinissamik, kiisalu taassuminnga allannguinissamik imaluunniit atorunnaarsitsinissamik suliaassanngortitsinnaapput. Taamatuttaaq Nunatta Katersugaasivia tamakku pillugit nammineerluni suliaassanngortitsinnaavoq.

Imm. 2. Eqqissisimatitassanngortitsinissamik imaluunniit kulturikkut kingornussatut allatigut illersugassanngortitsinissamik, kiisalu taassuminnga allannguinissamik imaluunniit atorunnaarsitsinissamik aalajangiinerit sioqqullugit inuit tamat, piginnittoq, atuisut nunaminertamik atuinissamut akuerineqarsimasut allatulluunniit nunaminertamik atuisinnaatitaasut kommunilu - illup imaluunniit summiiffiup kulturikkut oqaluttuarisaanermut attuumassuteqartup inissisimaffigisaa - attuumassuteqartullu naapertuuttut allat ilisimatinneqassapput. Ilisimatitsinermut piffissaliusaaq qaammatinik 3-nik sivisussuseqassaaq, piffissallu taassuma iluani susassaartut oqaaseqaateqarnissaminut periarfissaqassallutik. Aammattaaq Kulturikkut kingornussat pillugit siunnersuisoqatigiit inassuteqaateqassapput, tak. § 16, *imm. 2*.

Imm. 3. Ilisimatitsinerup nalunaarutigineqarneraniit eqqissisimatitassanngortitassatut imaluunniit kulturikkut kingornussatut allatigut illersugassanngortitsinissamut eqqarsaatigineqartumut akornutaasinnaasumik ajornakusuulersitsisumilluunniit iliuuseqartoqassanngilaq. Tamannali atuutinngilaq aatsitassanik misissueqqaarnissamut, ujarlernissamut atuinissamulluunniit akuersissutaareersunut naleqqiullugu.

Imm. 4. Eqqissimatitassanngortitsinissamik kiisalu taassuminnga allannguinerit atorunnaarsitsinerilluunniit Nunatta Katersugaasiviata aalajangiiffigissavai. Kulturikkut kingornussatut allatigut illersugassanngortitsinissaq, kiisalu taassuminnga allannguneq atorunnaarsitsinerlluunniit, Naalakkersuisut Nunatta Katersugaasiviata tamanna pillugu inassuteqaateqareerneratigut aalajangiiffigissavaat.”

10. § 18, oqaasertalerneqassaaq imatut:

“§ 18. Eqqissimatitassanngortitsinerit aamma kulturikkut kingornussatut allatigut illersugassanngortitsinerit, taakkuninnga allannguinerit imaluunniit atorunnaarsitsinerit, tamanna pillugu aalajangiinermit ullut 14-it qaangiutsinnagit, Nunatta Katersugaasiviata tamanut nalunaarutigissavai. Piginnittoq, atuisut nunaminertamik atuinissamut akuerineqarsimasut allatulluunniit nunaminertamik atuisinnaatitaasut kommunilu, illup imaluunniit sumiiffiup kulturikkut oqaluttuarisaanermut attuumassuteqartup inissisimaffigisaa, attuumassuteqartullu naapertuuttut allat toqqaannartumik ilisimatinneqassapput.

Imm. 2. Eqqissimatitassanngortitsinerit aamma kulturikkut kingornussatut allatigut illersugassanngortitsinerit pillugit aalajangiinerit Nunatta Katersugaasiviata piunasaqaateqarneratigut Nunatta Eqqartuusivianit nalunaarsorneqassapput. Piginnittut nikinneri Nunatta Eqqartuusiviata Nunatta Katersugaasivianut nalunaarutigissavai.

Imm. 3. Eqqissimatitsineq aamma kulturikkut kingornussatut allatigut illersugassanngortitsineq, illumut imaluunniit sumiiffimmut kulturikkut oqaluttuarisaanermut attuumassuteqartumut pisinnaatitaaffimmik pigisaqartuusut ataqqissavaat, pisinnaatitaaffimmik pigisaqarneq qaqugukkut pilersinneqarsimanersoq apeqquaatinnagu.”

11. § 19, oqaasertalerneqassaaq imatut:

“§ 19. Inatsisartut inatsisaat manna malillugu eqqissimatitsinissap imaluunniit kulturikkut kingornussatut allatigut illersugassanngortitsinissap pisariaqalersippagu, Naalakkersuisut pigisamik arsaarinninnikkut piginnittuulernissamut pisinnaatinneqarput. Pisortat arsaarinninnerat pissaaq pigisanik aalaakkaasunik arsaarinnissuteqartarneq pillugu Inatsisartut inatsisaanni maleruagassat malillugit.“

12. § 21, *Imm. 1*, oqaasertalerneqassaaq imatut:

“§ 21. § 5, imm. 3-miit 5-imut, § 11, oqaaseqatigiinnik siullernik, § 13a, imm. 3-mik, § 13b, imm. 3-mik, § 14, imm. 1-imik aamma 2-mik, § 17, imm. 3-mik aamma § 13, imm. 5, § 13a, imm. 4 aamma § 13b, imm. 4 naapertorlugit aalajangersakkanik unioqutitsinerit akiliisussanngortitaanermik kinguneqarsinnaapput.”

13. Inatsisartut inatsisaata qallunaatuuani sumiluunniit “Landsstyret“ “Naalakkersuisut“-nit allanngorneqassaaq.

§ 2

Inatsisartut inatsisaat atortuulerpoq ulloq 1. december 2009.

Namminersorlutik Oqartussat, ulloq xx.xxxx 2009

Kuupik Kleist

/

Mimi Karlsen